

TE HEMURAA API

I neia i te piha neneiraa na te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farane i te matahiti hoê.

Nu. 12.

Ditema 1927.

Mat. 21.

Ei ite hoi matou no'na i taua mau parau nei, e te Varua Maitai atoa ta te Atua i horoa mai i te feia i faaroo ia'na ra. (Ohipa 5:32)

Ta te Varua e faatupu ra, o te hinaaro ia, te oaoa, te hau, te faaoromai, te mârû, te maitai, te faaroo. Te mama-hu, te hitahita ore. (Galatia 5:22-23)

Te Faaroo no te Feia Mo'a Mau.

Ua iritihia teie nei parau na roto mai i te buka, Te Faaroo no te Feia Mo'a Mau tei papaihia e Tamate; Faaauhia ei reo Tahiti e Ioane Orotana.

*Te faaroo nei matou o taua mau faaueraa ra; * * * te maha ra, te tuuraa rima ia no te horoaraa'tu i te Varua Maitai.*

(E tuatiraa teie nei parau.)

UIRAA 4. E horoahia mai te Varua Maitai ia vai?

Pahonora 4. E horoahia mai te Varua Maitai ia ra-tou tei haapao; oia hoi, ia faaroo, e ia tatarahapa, e ia baptizohia i roto i te pape e horoahia mai ia te Varua Maitai.

Parau Tauturu: "Na'u hoi e ani atu i te Metua ia, e na'na e horoa mai i te tahi Faaa'o ia outou, ia parahi mau oia e a muri noa'tu i ô outou nei.

O te Varua parau mau ra, o te ore e fariihia mai e te

ao nei ra, no te mea aore i hió ia'na, e ite râ outou ia'na e parahi mau hoi oia i ô outou nei, e ei reto hoi ia outou." Ioane 14:16-17)

Ua haapii atura te aposetolo tahito ra e, ia ratou tei baptizohia e horoahia mai ia te Varua Maitai. (Ohipa 2:38) Ua haapii atoa mai Ioane Baptizo e, e horoahia mai te Varua Maitai ia ratou anaé tei baptizohia i roto i te tatarahapa. (Maitaio 3:11) E taió taton i te horu o to Philipa ao-haere-raa'tu i te evanelia i to Samaria. Ua rotahihia to ratou mau manaó, e ua imi ihora ratou i te baptizo. Ua haere maira Petero raua Ioane e tuu maira i to raua na rima i nia ia ratou, e ua farii ihora ratou i te Varua Maitai. (Ohipa 8:5-8; 12:14-17)

Eita te Varua Maitai e parahi i roto i te hielo viivii. Ua parau maira Paulo e, e riro te taata ei hielo no te Atua, e e parahi hoi te Varua o te Atua i roto ia'na. E te vai ra hoi te utua rahi no te baaviiviraa'tu i taua hielo ra. (I Korinetia 3:16 e te pene 6:19; II Korinetia 6:16) Ia faaroo tatou i te Atua, e arataihia ia tatou i roto i te tatarahapa; ei reira e faaotihia'i te baptizoraa; ei reira, e tae mai ai te Varua Maitai na roto i te tunraa rima; e na roto hoi i te reira e roaa'i te mau horoaraa o te Atua ra.

Uiraa 5. O vai te hoé mau taata tei farii i te Varua Maitai i nia iho ia ratou, hou to ratou baptizo-raa-hia?

P. 5. O Korenelia ia e to'na ra utuafare.

Uiraa 6. No te aha te Varua Maitai i tae mai i nia iho ia'na, hou to'na baptizoraahia?

P. 6. No te feii rahi i rotopu i te Ati Iuda e te toeá o te taata, i na reira ai te Atua. Ia riro te reira ei tapao i te Ati Iuda, ua tae mau te evanelia i te Etene. Noa'tu râ te reira ua faahapa mai te tahi pae o ratou. (Ohipa te pene 10)

Parau Tauturu: E tae pinepine mai te mana o te Va-

rua i nia i te tahi pae taata tei ore i bapetizohia. No te mea, te Varua Maitai ia te tumu no te maramarama o te taata, e na roto mai i te reira, ua rave-noa-hia te mau ohipararahi e te maere i tera tau e i tera tau. Area râ, aita te taata e farii i te îraa o te Varua Maitai, maori râ, na roto i te faaroo, te tatarahapa, e te bapetizo; e aita hoi e rave-ê-hia'tu taua mana ra, maori râ, na roto i te haapao ore.

Uiraa. 7. Nahea e horoahia'i te Varua Maitai?

P. E horoahia te Varua Maitai na roto i te tuuraa rima, e te faahitiraa'tu i te hoé pure, e te mau tavini a te Atua tei mau i te mana Autahuáaraa no taua ohipa ra.

Parau Tauturû: Na roto i te mau parau papai, e ite ai tatou e, teie ia te huru raveraa i haapaohia e te mau aposetolo, e i muri aé, ua haapao-atoa-hia e te mau taata i roto i te Ekalesia. E ite tatou i te reira na roto i te taioraa i te parau tuatapapa no te mau nunaa. Teie hoi ia te raveraa i haapaohia e te Ati Nephi; e i teie tau hopea ua tae mai te faaueraa no ô mai i te raî ra, ia na reira'toa tatou i te rave.

Ua horoa Petero raua Ioane i te Varua Maitai, i to Samaria, na roto i te pure e te tuuraa rima. (Ohipa 8:14-17) Ua na reira Paulo i te mau taata no Ephesia o tei bapetizohia e ana ra, e ua tae mai te Varua Maitai i nia ia ratou, e ua parau atura ratou i te parau êê. (Ohipa 19:2-6) Ua faaitoitoe Paulo ia Timoteo, eiaha ia moe ia'na te mea i horoahia mai na roto i te tuuraa rima ra. (II Timotea 1:6) Na te parau i papaihia i roto i te Hebera e faaite ia tatou e, e faaueraa te tuuraa rima no te evanelia i muri i te bapetizo. (Hebera 6:1-2)

Ua tuu atura Alama i to'na na rima i nia iho i to'na mau hoa rave ohipa, e ua faaîhia ihora ratou i te Varna Maitai. (Alama 31:36) Ua horoahia te Varua Maitai i te mau aposetolo i rotopu i te Ati Nephi e Iesu iho, na roto i

te tuuraa i to'na ra rima i nia iho ia ratou. (III Nephi 18: 36-37)

I teie tau hopea nei, ua riro te reira, ei ohipa na to te Autahuáaraa, ia tuu ratou i te rima, a haamau ai ratou i te melo apî i roto i te Ekalesia, i te horoaraa ia ratou i te Varua Maitai. (B. F. 20:41-43) Ua fafau mai te Atua e, e horoahia mai te Varua Maitai ia ratou atoa tei na reirahia e ta'na ra mau tavini i maitihia no taua ohipa ra. Te peresibutero tei faatere i te reira ohipa, e parau ia oia e. *“Te haamau nei au ia'oe ei melo i roto i te Ekalesia a Iesu Mesia i te Feia Moá i te Mau Mahana Hopea Nei, A farii i te Varua Maitai.”* Ua nehenehe râ i te peresibutero ia faahiti atu ite tahi mau haamaitairaa, mai te au i te mau manaó e tae mai i roto i to'na ra feruriraa.

Tei roto i te Autahuáaraa a Melehidekeda te mana no te /s tuuraa rima, area te baptizoraa i te pape râ, ua tia ia ia-vehia te reira, e te hoé tahuá i roto i te Autahuáaraa a Aarona. (B. F. 20:38-43) (B. F. 20:46-50) Na /hehenraa e te haapii ia tatou i te tumu i haere mai ai Petero rana o Ioane i rotopu i to Samaria, i muri aé i to ratou baptizo-raa-hia e Philipa ra. Te vai ra te mana ia Philipi no te baptizoraa ia ratou i roto i te pape, aita râ to'na e mana no te tuuraa rima, no te mea e tahuá oia i roto i te Autahuáaraa a Aarona. Ua haere mai râ Petero raua Ioane no te tuuraa rima, no te mea te vai ra ia raua te mana, o roto ia rana i te Autahuáaraa a Melehidekeda. (Ohipa 8:5-17) /s

U. 8. Eaha te mau tapao e riro ia ratou tei faaroo, *out* e te farii /s na i te Varua Maitai?

P. 8 “E te feia faaroo ra, e riro ia ratou teie nei mau tapao; e hee te mau demoni ia ratou i to'u nei i'oa; e parau hoi ratou i te parau apî: e rave noa hoi ratou i te ophi; e ia inu ratou i te mea taero, e ore ratou e ino; e ora hoi te maí ia ratou ia tuu i to ratou rima i nia iho.” (Mareko 16: 17-18)

Parau Tauturu Ua opere-maitai-hia teie mau horoaraa o te Varua e te Atua i rotopu i te taata nei, no te faaoraraa i ta'na mau tamarii. Ua haapii maira Paulo e, "E teie nei, aita vau i hinaaro, e au mau taeae, e ia ore outou ia ite i te mau mea a te Varua ra. E rave rahi te huru o te mau mea i horoahia hoé râ Varua. Ua horoahia ta te Varua faaite i te taata atoa, ia maitai paatoa. I horoahia mai te parau paari e te Varua, i te hoé ra; e i horoahia mai e taua Varua ra te parau e noaa'i te ite, i te hoé. Ta te tahi ra, o te faaroo ia, na taua Varua ra; ta te tahi ra, o te ite ia i te faaora mai na taua Varua ra. Ta te tahi ra, o te rave tapao ia; ta te tahi ra o te tohu ia, ta te tahi ra o te ite varua ia; ta te tahi ra, o te parau êê ia; ta te tahi ra, o te faaite parau êê ia. Na taua Varua hoé ra i ohipa i taua mau mea atoa nei, i te opere-maite-raa i ta te taata atoa i ta'na i hinaaro ra." (I Korinetia 12:1,4,7-11)

Te Evanelia Tatarahia

"A ore hoi au i haama i te evanelia o te Mesia ra, no te mea, o te mana ia o te Atua, ia ora te feia atoa i faaroo ra, te ati Iuda na e te Heleni atoa hoi. Tei reira hoi te parau-tia a te Atua i te faaroo i te faaiteraahia mai ei faaroora, mai tei papaihia ra e, Te feia parau-tia i te faaroo ra, e ora ia." (Roma 1:16-17)

I te haamataraa o teie parau rii e feruri tatou no nia i te auraa mau o te parau ra *Evanelia*. Te parau evanelia mai te au i to tatou ite nei o te hoé ia parau i haapiihia e te mau haapaoraa atoa i te ao nei. Ia feruri tatou i te reó Heleni e ite ia tatou i te hoé parau i faahitihia *Evangelia*. No reira mai to tatou parau *Evanelia*, e ia iritihia taua parau ra i te reó Baratane tahito e ite ai tatou i te parau ra

God spel o tei haapotohia i teie nei tau i roto i te parau ra *Gospel* e aore râ "Te Aamu o te Atua." E teie nei ua ite tatou i te auraa mau no te parau *Evanelia* oia hoi, Te Aamu o te Atua.

Ua faaroo atoa aénei tatou no te evanelia o te Tamaiti a te Atua e mai te auraa o te parau evanelia i papaihia i nia nei, e feruri â tatou no te evanelia o te Tamaiti a te Atua. E taua parau nei o te hoé ia opuaraa e aore ra te hoé mau ture e te mau oroa o tei aratai i tei haapao i te reira i te ora mure oia hoi, e hoí ratou o tei haapao i te Basileia o te Fatu Teitei, ei reira e faaea ratou e a muri noa'tu ma te oaoa e te hanahana tei roaa ia ratou o tei haapao i te parau tia ra.

Te mau ture e te oroa a te evanelia ta tatou e haapii nei e mau vahi rii ia no te mure ore, o tei hehenhia mai i te taata e te Atua, e ua riro taua mau vahi ra ei ravea e nehenehe ai ia tatou ia hoí i te raí no reira mai tatou i te matamua ra. Ua faarirohia te mau ture e te mau oroa ta te Atua i heheu mai i te mau mahana hopea nei ei ravea e ora'i te mau tamarii a Adamu raua Eva o tei ore i faahapa i te Varua Maitai. E faaorahia tatou atoa i te hoé vahi no te Basileia o te ao, aita râ te paatoaraa e ô i te tufaa teitei roa aé no te mea e raverahi te mau fare i roto i te Basileia o te Atua ra, e e tomo tatou i roto ia au i ta tatou ohipa i te ao nei. "E raverahi te parahiraa mau i te fare o tan Metua ra; ahiri aita ra, ua parau atu ia vau ia outon. Te haere nei au e haamaitai i te hoé vahi no outon." (Ioane 1:2)

E teie nei, te mau hoa e te mau taata atoa tei taió i teie parau rii. Tei i roto i te Ekalesia i parauhia Momoni te parau mau. Te faito nei te Ekalesia i te parau mau i hehenhia mai e te Atua. Ua heheu mai te Atua i te ite atoa e na tarahu te taata ia'na.

A haamata ai te evanelia o te Tamaiti a te Atua i te vahi hoé, ua tae iho â ia te maramarama, e te ite e te mau parau faaiteraa moá. Tei i roto i te reira te mau parau mâ e te viivii ore e ua aratai te evanelia i te taata i te rave i te ohipa rahi e te maitai.

No reira te papai nei au e, tei te Ekalesia a Iesu Mesia i te Feia Moá i te Mau Mahana Hopea Nei, o tei parauhia Momoni te parau mau. E mai te mea te vai nei te parau mau i nia i te raí e aore râ i raro ia Hade te faaroo nei te Ekalesia i te reira no te mea te imi nei matou i te parau mau atoa ra.

“Te faaroo nei matou e, eiaha e eiâ, eiaha e haavare, eiaha hoi e taiata, ei aau mārû ra, e te viivii ore, e te haamani-maitairaa’tu i te taata atoa. E ia na ô tatou i te faaiteraa’tu, te pee nei matou i te aóraa a Paulo, te faaroo nei matou, e te tiaí nei hoi i te mau mea atoa nei. E rave rahi te mau mea i faaoromaihia e matou, e te hinaaro nei hoi matou e, ia itoitou matou i te faaoromai i te mau mea atoa ra. E mai te mea te vai atura te hoê mau mea tia ra, e te mau mea viivii ore ra, e te mau mea popouhia ra, e te mau mea roo maitai ra, e feruri maite â ia matou i te reira.” (Hiroa Faaroo 13)

—Papaihia e Toma

To Tatou Nei Varua

E AHA ia te ora, maori râ te apitiraa i te tino ió e te tino varua? Eaha ia te pohe maori râ te faataa-ê-raa i taua na tino ra? Nohea mai to tatou tino ió, e nohea mai hoi to tatou tino varua? O te tahi na uiraa teie i ui-noa-hia mai-ra, no te mea te imi nei te taata’toa i te mau parau no to’na tupuraa ra.

Te ora ra tatou, hou te niu o teie nei ao i hamanihia'i, i roto i to tatou tino varua. Te na ô maira Ieremia e, "Aita oe i hamanihia e au i roto i te opu, i ite ai au ia oe; e aita oe i fanau, i faataahia'i oe e au; e ua haapaohia oe e au, ei peropheta na te mau fenua." (Ieremia 1:5) E te na ô maira te Atua ia Ioba e, "Ihea oe ia'u i haamau i te tumu o te fenua nei? A fatu atoa'i te mau fetia poipoi i te himene, e ua pii noa te mau tamarii atoa a te Atua i te oaoa." (Ioba 38:4) No reira tei reira iho â tatou i tana taimera, te tane e te vahine atoa, no te mea e mau tamarii anaé tatou na te Atua. Te ora ra tatou i to tatou tino varua, e i te hamaniraahia o teie nei ao te oaoa ra tatou no te mea te reira ia te vahi e haere ai tatou ia roaa'i te tino ió, e na roto i te reira ua nehenehe ia haere i mua.

Ua faai-ê-hia na to tatou aiaraa matamua, e no reira teie nei ao i hamanihia'i ei aiaraa piti no tatou. Aita râ te tahi pae o te mau varua i mauruuru i te mau opuaraa' o te Atua, e no reira ua faatupuhia te hoé tamai rahi, e ua hurihia'tura ratou i rapae au i te raí ra. (Apokalupo 12:7-9) Ua mauruuru râ tatou, oia hoi te mau tamaroa e te mau tamahine a te Atua i To'na opuaraa e ua faatia Oia ia haere mai tatou i te ao nei ia roaa te tino ió, ia riro tatou mai Ia'na te huru.

"Hamani ihora hoi te Atua i te taata ma to'na ihora huru, i hamani oia ia raua, o te tane e te vahine." (Genese 1:27) I roto i taua irava nei ua papu ia tatou te huru o to tatou hamaniraahia i te pae varua, no te mea te na ô maira Oia i roto i te pene 2 e te irava 5, "e aore hoi e taata ei faaapu;" e i muri iti aé ua na ô maira Oia e, "A hamani ai te Atua ra o Iehova i te taata i te repo fenua nei, ua haapuai ihora oia i te aho ora i roto i tana apoo iho ra, riro aéa te taata ei taata ora." (Irava 7) Te reira ia to tatou hamaniraahia i te pae tino, oia hoi, na faarirohia te repo o

te fenua ei ió no te taata, e na tuuhia'tura to'na iho varua i roto i taua tino ra ia riro te reira ei mea ora.

Aita roa e nehenehe ia tatou ia manaó e, aita to te vahine e varua, no te mea na mua to'na varua i te hamani-raahia i to'na ra hamaniraahia i te pae tino, oia hoi to'na iritiraahia mai no roto mai i te aoao o Adamu, no te mea te hamaniraa ió ia te reira e ere ia te hamaniraa varua mai te faaitehia mai i te pene hoé e te irava piti ahuru ma hitu. E te na ô maira Mose e, "E tuu oe e Iehova, e te Atua o te mau varua o te taata atoa ra, i te hoé taata i nia iho i teie nei amuiraa." (Numera 27:16) Aita teie irava i na o mai e, te Atua o te mau varua o te tane atoa ra, te na ô maira râ oia "te Atua o te mau varua o te taata atoa ra," e ia amuihia te tane e te vahine i roto i te hoé piiraa ua parauhia taua tiaa taata ra e, *te taata*.

Te vai atura te tahi manaó maitai i roto i te Genese 1: 27; no te huru o te Atua. Aita e nehenehe i te Atua ia vai ei tane e ei vahine i te taime hoé e no reira, nahea e nehenehe ai ia'na ia hamani ia raua i To'na ihora hohoa? Tera mai ia te pahonoraa: no te mea te vai atoa ra to tatou Metua Vahine i te raí ra mai to raro nei, e ua tauturu oia i to tatou Metua Tane i te hamaniraa i to tatou tino varua i roto i te raí ra. Te na ô maira te hoé himene na te Feia Moá e,

Ho'e noa iho Metua i nia?

Eiaha, e mana'o huru é;

E piti râ te vai noa ra,

Mai tei raro roa nei.

Teihea te parau tei faatupu i te oaoa aé i te reira? Te faatura noa nei tatou i to tatou metua vahine i te ao nei, eaha e ore ai tatou e faatura i to tatou Metua Vahine i te raí ra?

—*Papaihia e Elita.*


Te Mau Parau Apî

Ua faaoti Ruth Elder (te vahine matamua tei tamata i te faatere i te pahi reva mai New York i te fenua Amerika e tae roa'tu i te oire Pari i te Farane) i to'na tere, a ino ai to'na pahi reva e hoé tausani maile i tua. Ua faaorahia râ oia e te mau taata no te hoé pahi auahi Purutia, o te afai mai ia'na mai roto mai i to'na pahi reva i te taime i paapaa-hia'i te reira i te auahi.

Ua paapaahia te hoé fare haamaniraa pereoo nira i te auahi. Te haamata ra te ati i te hora 12 i te po, te taoto ra te mau taata faatere; no reira aita to ratou e ravea e iriti mai ai te mau pereoo i rapae. A ara mai ai ratou ra ua tupu te auahi i te rahiraa, e ua paapaa-roa-hia te mau ohipa'toa i roto i taua fare ra. Ua pau e 90,000 dara, moni Marite, i taua auahi ra.

Ua rau te huru o te mau boti i hamanihia i teie nei mau mahana. Ua hinaaro noa te mau taata i te boti vitiviti i te tere mai te pereoo uira te huru. Ua hamanihia te hoé boti i Marite, e ua tuuhia te machine no te pahi reva i nia iho ia'na, e aita hoi to'na pererau i tuuhia i raro i te miti ua vaiihohia râ te reira i nia aé, e ia hió te taata ia'na ua au ia i te hoé machine reva i tuuhia i nia i na vaa e piti ra. Ia hamata mai te machine i te tere e mea puai ia, e ua tere oia e vaú ahuru maile i te hora hoé. Ua na ô maira te mau taata faatere e, o te hamataraa ia taua boti ra o te mau boti vitiviti, e eita e maoro e ite ai tatou i te boti i te tere e hanere maile i te hora hoé.

Ua faarirohia te radio ei taote. Aita te tahi mau pahi fereti e afai noa i te taote i nia iho, e no reira i te taime i tupu ai te mau mataro i te maí e mea ino roa ia. I mutaa ihora aita to ratou e ravea e faaora ai ia ratou e no reira ua pohe te tahi pae rahi no te mau taata o tei tupu i te maí i tua. I teie nei mau mahana râ ua huru maitai ia, no te mea e faaite ratou i te mau taote na te Hau i te huru o te maí na roto i te radio. Ia tae taua parau ra i te fare farii parau radio, taniuniuhia ihora ia i te taote, apoo ihora te mau taote ia hiópoa ratou i te huru o te maí. Ia oti maitai ratou i to ratou apooraa e ia papu hoi te huru o te maí ia ratou, e taniuniu e taradio atu ratou i te pahi i te ravea e ora'i te taata maí ra. Ua opanihia i te mau fare radio, noa'tu to ratou huru, ia farii i te moni no te reira ohipa, e ua haponono noa ratou i taua mau parau radio ra ma te tarahu taime ore.



TE HURU NO TE HAUTIRAA NA NIA I TE PAPE
PAARI I ROTO I TE TAU TOETOE I TE
FENUA PAPAA.

Ua tupu te mau aueeneraa fenua e rave rahi i te fenua Italia, e e rave rahi te mau taata o tei roohia i te mau ati i reira. Ua haamou-roa-hia te mau fare e rave rahi e te faaea noa nei te mau taata no te mau oire i mou ra i rapae. Area râ, ua oaoa ratou no te mea e, aita e hoé taata i pohe i tana ati rahi ra.

Te na ô maira te mau taata no Alahabad, Inidea e, ua iteahia te hoé tamarii tamaroa taehae, e ua parauhia oia ra e, Te Tamaiti Luko. I te haereraa o te tahi mau taata no taua fenua ra i nia aé i te mouá i te imiraa i te mau puaa taehae, ua tae ratou i te hoé vahi e hitu ahuru ma pae maile i te atea no taua oire ra; i reira to ratou iteraa i te tamaiti luko. Ua afaihia taua tamaiti ra i te oire e ua tuuhia oia i roto i te hoé fare tapearaa no te mau taata maa-maa e te manaó paruparu. Ua hiópoahia oia e te mau taote, e ua manaó ratou e, ua tae oia i te vaú e aore ra ite ahuru no to'na ra mahahiti. Ua nehehehe ia'na ia tia i nia e ua huru pâpû rii oia i te haere i nia i to'na na avae e piti; to'na hinaaro mau râ ia neenee noa i raro i nia i te fenua na to'na avae e to'na rima atoa. Te parau nei te mau taote e, a vai ai oia i te mouá ra, te amu noa ra oia i te huero e te mau tumu raau rii. I teie nei râ ua horoahia te tahi mau huru maa ia'na, ia faatihia râ oia i te haere i rapae, e amu ia oia i te matie. Aita roa oia i te parau maori râ e aoa noa oia mai te uri te huru, e te tahi mau hora na taehae roa oia. Ua iteahia taua tamaiti ra i roto i te apoo no te hoé luko, e te vai ra te tapao no te hoé motu rahi i nia i to'na mata mai te mea na hohonihia oia e te luko i te matamua ra. Ua manaóhia e, na eiáhia taua tamaiti ra i to'na apiraa e na tana luko ra i haapao, e faaamu, e tia'i ia'na mai reira mai â.

Alma G. Burton Imprimeur,

Rue Brea et de la rue Dumont d'Urville, Orovini, Papeete